

Paur kute Garaxakam me jamã pi'ôk no'ôk ne ja.

Paur ne pykabê Garaxakam me jamã pi'ôk no'ôk ne. Nãm arým pyka kuni'yîr mrãnhkôt me'yîr bôx ne memã Jeju jarê nhym me kwý arým tu amim markumrêx ne 'ã abeno akprô. Nhym kam Paur arým mã me jadjwý'yîr tẽ nhym tekrekam mebê idjaer kwý me'yîr bôx ne memã kum,

—Djãm ar aje tu amim Jeju markambit Metĩndjwýnh kute ar apytâr? Kati, dja gar prĩne Môjdjê kukràdjãdjwý kôt ar amijo aban kam arým Metĩndjwýnhmã amex, ane.

Nhym kam Paur memã kum,

—Arkati. Mrãmri ne me tu amim Jeju markumrêx nhym Metĩndjwýnh arým memã axwe kêt jarê nhym me arým kum mex. Me ta ne me mýjja kukràdjãkôt amijo bakôt Metĩndjwýnhmã mex kêt. Mrãmri ne me tu amim markumrêx nhym Metĩndjwýnh ukaprikôt arým memã axwe kêt jarê, ane.

Djã nãm ã Abraão Môjdjê kukràdjãkôt amijo bao ane nhym Metĩndjwýnh arým kum axwe kêt jarê? Kati, nãm tu Metĩndjwýnh markumrêx ne arým Metĩndjwýnhmã mex. Nhym amũ tũmrãm Môjdjê katon memã kukràdjã jarê. Bir be, gwaj badjwý tu amim Jeju markumrêx ne arým kênhkam ar baba. Gwaj bajaxwe kute gwaj bate djê pyrãk ne gwaj babê Metĩndjwýnh kurê. Nhym Metĩndjwýnh arým bajaxwebê bapytã. Arým ne gwaj bate djê apêx. Mýkam dja gwaj akubyn Môjdjê kukràdjã tũmo amite djê ar o baba? Kati, Jeju kute gwaj bajãpre bônkhkam gwaj kênhkam ar babakam gwaj Jeju kukràdjã ny kôt amijo baba rã'ã. Nãm ã Paur memã anen ajte memã Jeju kute anor kôt memã amijarê. Tãm ne ja.

1 ¹Ba ne ba ibê Paur. Djãm pykakam me'ô kajgo ne ijano? Nâr, djãm Metĩndjwýnh ne me'ô kajgomã ijã karô nhym ijano? Kati. Jeju Kritumê Bãmbê Metĩndjwýnh ijano ba arkum idjãpênh iba. Jeju Kritu arým ty nhym Bãm akubyn o tĩn ne. ²Jeju kukwakam bakamydjwý ikôt dja bar wãm ar amã ikabên mex jarê. Pi'ôk no'ôkkam ar amã arê. Pykabê Garaxakam apýnh ar aje amim Jeju mar ne kôt ar aben pydjio aba djãri ne ba ar amã ikabên mex jarê.

³Metĩndjwỳnhbê ne me Babām. Ne Bẽnjadjwỳr djwỳnhbê ne Jeju Kritu. Gê ar tu kum ar akaprĩn^a ar ajo ba gar adjumar mex rã'ã ne. ⁴Jeju Kritu ne gwaj bakadjy amingã. Nãm gwaj bajaxwe pãnh ty. Me kum Metĩndjwỳnh kĩnh kêtja ne me axwe:. Mekôt bajaxwe kêt kadjy gwaj bapãnh ty. Kute kubê gwaj bapytàr kadjy gwaj bapãnh ty. Me Babāmbê Metĩndjwỳnh kute kum 'ã karô kôt ne gwaj bapãnh ty. ⁵Metĩndjwỳnh ne ra:x ne uma:. Gê me aben djô'ã memã Metĩndjwỳnh rax jarênh rã'ã: rã'ã ne. Mrāmri, tãm ne ja.

Me memã Kritu kupa'ã ujarênh nhym mebê uma.

Mat 7.15; Ep 4.14; Kor 2.8; A Ped 2.1

⁶E kum, djām ar ga ne gar ajaxwe kêt nhym Metĩndjwỳnh pãnh kum ar akaprĩn amiwỳr ar ajuw ne ar ajo ba? Kati. Ar ga ne gar ajaxwe: nhym ta kum ar akaprĩ. Kritu ar ajaxwe pãnh ty nhym kam Metĩndjwỳnh ta kum ar akaprĩn amiwỳr ar ajuw ne ar ajo ba. Nhym kam wãnh me kwỳ ar awỳr bôx ne arỳm 'lêx ne ar amã we Kritu'ã ujarênh ny 'ôdjwỳ jarê. Me wãnh ar amã arê gar arỳm ijaêrbê me'ỳr amijo akêx ne mekôt amijo abao dja. ⁷I:je. Djām mrāmri ne me ar amã Kritu'ã ujarênh ny jarê? Kati. Nãm me arĩk ar anoo biknoro ba. Kritu kupa'ã ne me ar amã arênh ba.

⁸Arỳm ne bar kàj bê ar amã arê, katāt Kritu'ã ujarênh nykumrêx jarê gar arỳm amim ama. Nhym be, godja ar ijô akubyn ar awỳr bôx ne ar amã Kritu kupa'ã ajte ujarênh ny 'ôdjwỳ jarênh jabej gê Metĩndjwỳnh on pãnh o akno gê biknor rã'ã rã'ã ne. Nār, godja kàjkwakam kadjy mrãnh djwỳnh 'ô ar awỳr bôx ne ar amã kupa'ã ujarênh ny 'ôdjwỳ jarênh jabej gê Metĩndjwỳnh on pãnh o akno gê biknor rã'ã: rã'ã ne. ⁹Bar ajte jakam ar amã arê gar ama. Arỳm ne bar katāt ar amã Kritu'ã ujarênh nykumrêx jarê gar amim ama. Nhym be, godja me'ô ar awỳr bôx ne ar amã Kritu kupa'ã ajte ujarênh ny 'ôdjwỳ jarênh jabej gê Metĩndjwỳnh on pãnh o akno gê biknor rã'ã: rã'ã ne.

¹⁰Djām me kum ikĩnhmã ne ba abej ar iba? Kati. Metĩndjwỳnh kum ikĩnh ne ba abej. Djām ije meo kĩnh prãm got? Kati. Ne ba ren meo kĩnh prãm ba ren ibê Metĩndjwỳnh nhô àpênhkumrêx kêt.

Jeju ta ne Paurmã amijarê.

A Kô 1.12; Tex k 2.4

¹¹Akmere, àpnhĩre ar, ba ar amã arê. Ije kàj bê ar amã Kritu'ã ujarênh ny jarênhja djām me'ô ta ne amim ujarênh'ã karôn imã arê? Kati. ¹²Djām me kute aben djô'ã ujarênh ar baja ne me'ô imã arê ba o iba? Kati. Nār, djām me'ô kute prĩne ujarênh marja ne imã arê ba kuma? Kati. Jeju Kritu ta ne imã ujarênh ny jarê ba maro iba. Tãm ne ba jakam pi'ôkkam wãm pykabê Garaxakam ar amã arê.

^a1.3 Djām ar ga ne gar adjukaprĩ nhym ar pãnh arỳm kum ar akaprĩ Kati. Ar ta ne ar tu kum ar akaprĩkumrêx.

¹³Arÿm ne me ar amã ijã ajarẽ gar ama. Amrẽbẽ ne ba mebẽ idjaer kukrãdjã kôt ar amijo iban Metĩndjwÿnh nhõ me ja kute amim Jeju maro ibikẽnh kumex. Ne kam me kute amim Jeju mar kêt kadjy mebẽ Jeju kurẽn abenbẽ me ngrãho iba. ¹⁴Ne mebẽ idjaermẽ ro'ã ijabatãnhja ije me kukrãdjã maro me akrenh mexo tẽ. Ne me ikukãmãre kukrãdjã tũm'ã ino tÿ:x ne o iba.

¹⁵Nhym kam Metĩndjwÿnh ta arÿm kum ikĩnh ne kum ikaprĩ. Djãm ba ne ba imã kĩnh nhym kum ikaprĩ? Kati. Ta ne tu kum ikaprĩn arÿm amiwÿr ijuw ne ijo ba. Adjãkamã inã tikkrekam ijẽtri ne Metĩndjwÿnh amijo ipytã.

¹⁶Ije kãj bẽ me bajtemmã 'ã idjujarẽnh kadjy arÿm imã Krao amirĩt. Kute imã Krao amirĩtkam djã nã bãm o me'õ kumrẽx ma nhym arÿm imã arẽ ba ô'ã memã arẽho iba? Kati. Kritu ta ne imã arẽ. ¹⁷Nãr, djã ne ba krĩraxbẽ Djeruxarẽ kumrẽxmã tẽn bõx? Nãm Jeju ar ja kumrẽx janon kam badjwÿ ijano ba kum idjãpẽn ar iba. Djã nã bãm Jeju kute ar anor ja kumrẽx'ÿr Djeruxarẽmã tẽn bõx nhym ar imã kabẽn'õ jarẽ ba memã arẽho iba? Kati. Ar'ÿr Djeruxarẽkam itẽm kêt. Ate ne ba pykabẽ Arabijkam tẽ. Ba kam ajte akubyn krĩraxbẽ Tamagumã akẽx. Kritu ta ne imã kabẽn jarẽ ba memã arẽho iba. Tãm ne ba jakam pi'õkkam wãm pykabẽ Garaxakam ar amã arẽ.

¹⁸Nhym kam ijã amex amãnhkrut ne ikjêkêt apêx. Kambit ne ba arÿm Djeruxarẽ'ÿr tẽ. Ije Pedru pumũnhmã 'ÿr tẽ. Ne kam Pedru'ÿr bõx ne ar iro'ã nhÿ. Ar iro'ã nhÿ: nhym ar ijã akatibẽ 15bit apêx ne. Djã ne ba kam idjãm 'ÿry got Pedru imã me kabẽn 'õ jarẽ ba memã arẽho iba? Kati. ¹⁹Djã ne ba kam Jeju kute ar anorja 'õdjwÿ pumũ? Kati. Ije ar 'õ pumũnh kêt. Bẽnjadjwÿr djwÿnh kamy axikôt katorja ne kubẽ Xijagu. Xijagubit ne ba omũ.

²⁰Djã nã bãm ar amã ijẽx? Kati. Metĩndjwÿnh kute imarkam ne ba mrãmri ar amã ikabẽnkumrẽx.

²¹Ne kam Djeruxarẽ kurũm ikaton tẽ. Tẽ:n kajõnhkôt pykabẽ Xirijmẽ Xirxij'ÿr tẽ. Tẽ:n kam arÿm kam bõx.

²²Nhym Djeruxarẽ bu'ã pykabẽ Djudêjakam apÿnh me kute amim Jeju mar ne kôt ar aben pydjio ba djãri me kute ipumũnh kêt rã'ã. ²³Nhym be, me kwÿ ne me amũ memã ijarẽn memã kum,

—Paur kute me bajo bikẽho ba ja ne arÿm jakam kãj bẽ Kritu'ã memã ujarẽn ar ba. Me kute Kritu kôt amijo bamã memã 'ã ujarẽn ar ba. Me kute Kritu mar kêt kadjy ne Paur amrẽbẽ mebẽ Kritu kurẽo ba. Ne jakam arÿm 'ã memã ujarẽn ar ba. Nãm me ã ijarẽnho ane. ²⁴Nhym me arÿm jabit man ikam Metĩndjwÿnhmã mextire jarẽnho kumex. Be, djãm kam ne me'õ ikabẽn'ã imã karõ ba memã arẽho iba? Kati. Kritubit ne imã arẽ ba arÿm pi'õkkam wãm pykabẽ Garaxakam ar amã arẽ.

Pedru ar kute Paur kabẽn'ã aben mar.

Kar 15.4

2 ¹Nã bãm ar iba: nhym kam ijã amexbẽ 14 apêx. Ba kam Banabekôt Djeruxarẽmã tẽ. Xitudjwÿ ne ba o tẽ. ²Metĩndjwÿnh ta ne imã 'ã karõ

ba kabên kôt 'ÿr tẽ. 'ÿr tẽ:n kam arÿm 'ÿr bôx. Ne kam me krăptĩ kàxã me rûnh kumrëxmẽ ro'ã akuprõ. Me kute amim Jeju mar rûnhmẽ ro'ã akuprõ. Memăbit ar rûnh pyrăkjamẽ ro'ã akuprõ. Ne kam memă arẽ. Ije me bajtemmă Kritu'ã idjujarënh ny jarënh ibaja ne ba memă arẽ. Ne ba ren Djeruxarëkam me krăptĩ kumrëxmă arën ren kam te memă arẽ nhym ren me kute imar kêt ne. Nhym be, kati. Me krăptĩ kàxã ne ba me rûnh kumrëxmă arẽ.

³⁻⁴Nhym Xitubê me bajtembê kreguja ikôt dja. Me ja ne me kute Môjdjê kukràdjà kôt amijo ba kêt ne my nhinhu kà tã. Nãm Xitu ikôt dja. Nhym me ta kute amijo 'êx ne kute amijo Jeju mar mexja ne me arÿm apdjun mekôt wadjà. Bar Kritu Jeju kabên kôt idjumar mex ne ar ibamă nhym me amim,

—Paur ar kute Môjdjê kukràdjà kôt amijo ba katàt jabej ba ar omũ. Gêdja ar kôt amijo ba kêt ba me kukràdjà'ã arkum apnê, ane. Ga, me ta te: kute Môjdjê kukràdjà kôt amijo ba mexja pumũ. Ne te: Metîndjwÿnhmă amijo mexo ban umar punu. Ar idjumar punu ja kadjy ne me ã amim ar ijã ane. Ne kam te: kute Xitu my kà kră'yrmă memă 'ã apnê. Djã ne me kute amim Jeju markam me rûnh ja ne mekôt kabên dji? Kati. Me mekôt kabên djir kêt ne kute,

—Gê ar Môjdjê kukràdjà kôt amijo tẽn on Xitumă my kà ta, anhÿr kêtukumrëx.

⁵Djãm ar ba ne bar me ta kute amijo Jeju mar mexja kabên kôt Xitu my kà krăta? Kati. Bar me kabên kôt Môjdjê kukràdjà kôt amijo itêm kêtukumrëx. Mÿkam? Bir, ne ba ren ar mekôt amijo tẽn my kà krăta gar ren ikôt Môjdjê kukràdjà maro aban kôt ar amijo aba. Ne kam ren arÿm Kritu kabên katàt mar kêt ne kôt amijo aba kêt. Amrêbê ne bar ar amă katàt Kritu'ã ujarënh ny jarë gar kôt ar amijo aba. Kôt amijo aba rã'ã kadjy ne bar me ja kôt amijo iba kêtukumrëx.

⁶Nhym be, memăbit ar kute rûnh pyrăk ja, me kute ar'ã abenmă kum,

—Amrêbê ne ar gwaj bamă wan gwaj bajo ba. Gwaj bamă ne ar raxkumrëx, anhÿrja. Djãm me kute ar rûnh'ã abenmă anhÿrkam djãm imă ar uma? Kati. Memăbit ne ar kute rûnh pyrăk. Nhym be, Metîndjwÿnhmă ne ar ngri:ren kajgo. Bir be, Kritu ne imă kabên jarë. Djãm ijukri ne ar rûnh imă mÿjja 'ôdjwÿ jarë ba kam memă arënh ibaja? Kati. Ar kute ijukri imă mÿjja'ô jarënh kêtukumrëx. ⁷Ne kam ar ipa krij ne ar itatakbit. Arÿm ne ar kute imar ne ar abenmă kum,

—Be, mrămri ne Metîndjwÿnh Paurmă kum, “Ga dja ga me bajtemmă Kritu'ã ujarënh ny jarë”, anhÿrkumrëx. Nãm ar ã abenmă ane.

⁸Metîndjwÿnh ne mebê idjaermă Pedru jano nhym arÿm memă Kritu'ã ajarë. Ga, me krăptĩ: arÿm kute tu amim markumrëxja pumũ. Metîndjwÿnh ajte badjwÿ ijano ba me bajtemmă 'ã ajarë. Ga, me jadjwÿ krăptĩ tu kute amim markumrëxja pumũ. ⁹Xijagumẽ Pedrubê Xepamẽ Djuăomẽ ne ar kumrëx tũm. Ar memăbit rûnh. Ar ja ne ar amim,

—Mrămri ne Metîndjwÿnh ta kum Paur kaprĩ:kumrëx nhym mrămri arÿm kôt kum àpênhkumrëx, ane. Nãm ar anen arÿm Banabemẽ bamẽ ar ipa krij ne ar itatak ne ar imă,

—Mrāmri ar ga dja gar me bajtem'ÿr mrān memā 'ā ajarē. Nhym be, ar ba dja bar mebê idjaer'ÿr mrān memā 'ā ajarē, ane. ¹⁰Ne kam ar imā,

—Dja gar ar ikam me ã mÿjja kêt mar rā'ā, ane. Jabit ne ar ar imā arē. Ba kam arÿm ar kuman amū memā me arēnho iba nhym me arÿm memā mÿjjao atomo ba. Nā bām ā Djeruxarēkam me maro anen arÿm pi'òkkam wām pykabê Garaxakam ar amā arē.

Paur Pedrumā kabên ne.

¹¹Bar kam krīraxbê Āxikimā tēn bôx ne kam dja. Nhym kam Pedru nīnh tēn kam Āxikikam ar iwÿr bôx. Ba kam arÿm kuka kônh kum ikabên ne. Arÿm Metīndjwÿnh kabên kupa'ā kute amijo tēmkam ne ba kum ikabên ne.

¹²Mÿkam? Bir, amrêbê ne Pedru tu me bajtemmê ro'ā àkuro krī. Ar ba ne bar me bajtemmê ro'ā idjàkuro nhÿ nhym Pedru mekmê ro'ā àkuro nhÿ. Nhym kam me kwÿ Môjdjê kukràdjà'ā no tÿxja arÿm bôx. Xijagu kurūm ne me bôx. Me ja ne me memā kum,

—Dja me me bajtemmê ro'ā àkuro krīn arÿm Môjdjê kukràdjà kupa'ā amijo tē. Nām me ā memā anhÿro ba. Me ja bôx nhym Pedru arÿm me omū. Ne kam arÿm me bajtemmê ro'ā ò kwÿ krēn krātan arÿm ate nhÿ. Me Môjdjê kukràdjà'ā no tÿxja, me my kà rēnhneja, kute 'ā kum kabên karō ne Pedru ate nhÿ. Me ja kute kum,

—Kwārīk wānh me bajtemmê ro'ā adjàkur kêt. Abê mebê idjaer. Môjdjê ne me bamā, “Kwārīk wānh me bajtemmê ro'ā adjàkur kêt”, ane ga kam me ro'ā adjàkuro akrī, anhÿr karō ne Pedru ate nhÿ.

¹³Nhym kam ar ikam mebê idjaer kunī Pedru kôt amijo mōn ate ar ibê nhÿ. Nhym kam Banabedjwÿ arÿm rerekre ne me umaje kôt amijo tēn ate me bajtembê amijo tēn ate ar ibê nhÿ.

¹⁴Ba kam me omū. Kritu'ā ujarēnh ny ne katàtkumrēx nhym me arÿm kupa'ā amijo mō ba arÿm me omūn arÿm Pedrumā ikabên ne. Me kunī nhipôkri ne ba 'ā kum ikabên ne kum,

—E kum, ga ne ga arÿm me bajtem kôt ar amijo aban ajte. Ga arÿm mebê idjaer kukràdjàbê amijo akēx ne arÿm me bajtem kôt ar amijo aba. Mÿkam ne ga arÿm jakam ajte mebê idjaer kukràdjà kôt me kute amijo ba'ā me bajtemmā karōo dja? Nā bām ā Pedrumā ikabēno ane.

¹⁵Ne kam ajte Pedru arkum,

—Mrāmri me bakukāmākjê kôt ne gu me babê idjaerkumrēx. Me baje me bajtem'ā abenmā kum, “Me axwe”, anhÿro baba. Djām me baje me wā kôt amijo baba got? Arkati. Me ba ne gu me babê idjaerkumrēx. ¹⁶Djām kam me kute Môjdjê kukràdjà kôt amijo bakam ne me mrāmri axwe kêt? Kati. Me kute kukràdjà kôt amijo baja ne me te axwe kêt prāmje. Nhym be, me tu kute amim Jeju Kritu markumrēx. Nhym kambit arÿm memā axwe kêt jarē nhym me kum axwe kêt. Tām ne gwaj amrêbê kuma. Me bajtemja ne me tu amim Kritu markumrēx. Gwaj badjwÿ ne gwaj bajaxwe kêt kadjy tu amim Kritu Jeju markumrēx. Djām gwaj bajaxwe kêt kadjy ne gwaj baje Môjdjê kukràdjà

marn kôt ar amijo baba? Kati. Kadjy ne gwaj tu amim Kritu markumrêx. Djâm pykakam me'ô ta axwe kêt prâm? Arkati. Me'ô ta kute Môjdjê kukràdjà marn kute kôt amijo bakam te: axwe kêt prâmje. Nã bãm ã Pedru arkum ane.

¹⁷Ne kam ajte arkum,

—Me'ô ta ne te axwe kêt prâmje. Nhym be, dja gwaj tu amim Kritu markumrêx ne arým bajaxwe kêt. Ne kam amim Kritu maro tẽ nhym arým gwaj bamã bajaxweo amirĩto tẽ gwaj arým amima. Gwaj baje amimarkam djâm gwaj baje me kwỳ kudjwa amim, “Ije amim Kritu kabẽn markôt ne ba ijaxwe”, anhỹr mã? Arkati. Kritu kute me axwe'ã memã àpnênh kêt. Kabẽnkôt me'ô axwe prâm kêtmarkumrêx. ¹⁸Be, amrêbê ne gwaj te: Môjdjê kukràdjà kôt bajaxwe kêt prâmje bajaxwe rã'ã ne. Nhym be, jakam ba arým kubê amijo akêx. Kubê ije amijo akêxkam ba ren ar akudjwa ren akubyn Môjdjê kukràdjà'ỹr amijo akêx ne ren amim,

—Ba Môjdjê kukràdjà man kôt ar amijo iban arým ijaxwe kêt, anhỹro iba. Djâm kam ba ren mrãmri ijaxwe kêt? Arkati. Akubyn ije 'ỹr amijo akêxkam ba ren arým Metĩndjwỳnh kabẽn mar kêt ne kam ren kam amikrà ar o iba.

¹⁹Amrêbê ne ba amim,

—Ba Môjdjê kukràdjà man kôt ar amijo iban arým ijaxwe kêt, anhỹro iba. Djâm kam mrãmri ijaxwe kêt? Kati. Ijaxwe rã'ã. Ne kam arým Môjdjê kukràdjà ma. Amrêbê ne Môjdjê memã kum, “Dja me axwe arým pãnh ty”, ane. Tãm ne ba kuman kam ijaxwe man kam arým amim,

—Kati. Dja ba Môjdjê kukràdjà man kôt ar amijo iban te ijaxwe kêt prâmje, ane. Kam ne ba arým Môjdjê kukràdjà kôt ar amijo iba kêt. Ga, me arým tykkam kute kôt amijo ba kêtja pumũ. Badjwỳ ije me tyk pyræk. Ne kam arým Metĩndjwỳnh kadjy itĩn ne ar iba.

²⁰Ba ne ba Kritumê ro'ã pĩte'ykam ty. Ne kam ba itĩn ne ar iba kêt. Kritu ta ne ikam tĩn ne ar ba. Nã bãm ã amimaro ane. Ne kam inhĩ jakam itĩn ne ar iba jakam ne ba tu amim Metĩndjwỳnh kra markumrêx ar o iba. Ta ne kum ijabẽn ijaxwe pãnh ty. ²¹Nãm Kritu ã kum ikaprĩ o ane. Djã nã bãm kubê ate ikrãn Môjdjê kukràdjàbit mar 'ãno dja? Djã nã bãm ijaxwe kêt mã kukràdjàbit man o Kritubê aptà? Kati. Ne ren me Môjdjê kukràdjà kôt ren axwe kêt nhym ren kam Kritu me axwe pãnh tykja ren kajgokumrêx. Nhym be, kati. Kritu kôtbit ne me axwe kêt. Nã bãm ã Pedru arkum anen ajte pi'ôkkam wãm pykabê Garaxakam ar amã arê.

Me ta kute amijo mex kêt.

Ep 2.8; Pir 3.9; A Xim 1.9; Xit 3.5

3 ¹Ar abê Garaxa ar, ar ano rere:kre. Mỳj me'ô ne ar amã 'êx ne ar anoo akno? Ê, Metĩndjwỳnh kabẽn katàtkumrêx. Kabẽn kôt ar aje amijo aba kêt kadjy ne me ar anoo akno. Arým ne ba prĩne ar amã Kritu pĩte'y'ã jêt'ã ajarê gar prĩne ama. Nhym kam me ar anoo akno. Ar ano rere:kre.

²Dja gar ar imã arê ba kuma. Djã nã gãm ar Môjdjê kukràdjà man kôt ar amijo aban kôt we ajaxwe kêt? Djã nã gãm we ar ajaxwe kêt nhym Metĩndjwỳnh Karô

arým ar awýr bôx ne ar ajo ba? Dja gar imã arê ba kuma. Kati. Nã gãm ar Kritu'ã idjujarênh man tu amim Kritu markumrêx nhym Karô arým ar awýr bôx. ³Nã gãm ar Metîndjwýnh Karôkôt amijo abamo krax. Djã nã gãm jakam Môjdjê kukràdjã man kôt ar amijo aban aje kôt ga: we amijo amexmã.

⁴Amrêbê ar aje Kritu mar'ã ne me ar ajo bikênho ba gar arým kadjy atokry kumex ma. Godja gar jakam kubê amijo akêx ne 'ã adjukanga jabej nhym arým kadjy ar atokry ja arým kajgo. Nhym be, kati. Ar aje mrãmri tu amim Kritu markumrêx rã'ã jabej arým atokryja kajgo kêt.

⁵Djã nã gãm ar Môjdjê kukràdjã man kôt ar amijo aban kôt we ajaxwe kêt nhym kam Metîndjwýnh arým ar amã Karô jano nhym kam ar akam mýjja pumũnh kêt nhipêx, ar akam apýnh me punuo mex? Kati. Nã gãm ar Kritu'ã idjujarênh man tu amim markumrêx nhym arým kôt ar amã Karô jano nhym kam arým ar akam apýnh mýjja pumũnh kêt nhipêx.

⁶Me bakukãmãre Abraôodjwý ne

“tu amim Metîndjwýnh markumrêx nhym arým tu kum axwe kêt jarê.”

⁷Kam, me kute tu amim Kritu markumrêx, me ja kunĩ kute mrãmri ne Abraão tãmdjwý pyrãk. Tãm dja gar ama. ⁸Amrêbê: ne Metîndjwýnh amim,

“Dja me bajtem tu amim Kritu markumrêx ba kam tu memã axwe kêt jarê nhym me arým axwe kêt.”

Nãm ã amim anen kam kãj bê Abraãomã tãm jarê. Nhym me arým 'ã pi'ôk no'ôk ne. Mrãmri ne me kute tu amim Kritu markumrêx nhym kute tu memã axwe kêt jarênh. Ja 'ã ne Abraãomã kum,

“Ga tu amim ikamnhĩxkumrêx. Ba kam arým imã akaprĩ. Dja atãmdjwý akôt tu amim imarkumrêx. Ba kam arým imã me kaprĩ. Dja apýnh me ba djãkam me bajtemdjwý akôt tu amim imarkumrêx. Ba kam arým imã me adjwýnhdjwý kaprĩ”, ane.

⁹Ga, me kute tu amim Kritu markumrêxja Metîndjwýnh arým kum me kaprĩja pumũ. Abraão tu amim kamnhĩxkumrêx nhym me kute kôt tu amim markumrêxja Metîndjwýnh arým kum me kaprĩ.

¹⁰Be, me kute amim,

—Dja ba Môjdjê kukràdjã man kôt ar amijo iban arým ijaxwe kêt, anhýro baja. Me ja kunĩ'ã ne Metîndjwýnh arým amim,

—Me wã dja ba me kanga nhym me arým me biknor tokry djãkam akuno, ane. Mýkam dja me kanga? Bir, amrêbê Metîndjwýnh me bakukãmãremã kum,

“Ga, Môjdjê kukràdjã'ã pi'ôk no'ôkja pumũ. Godja me mar kêt ne katãt kunĩ:kôt amijo ba kêt jabej ba dja ba pãnh me kanga nhym me arým me biknor tokry djãkam akuno.”

Nãm Metîndjwýnh ã me bakukãmãremã ane. Me bit kute kukràdjã kunĩkôt amijo baja, djãm kôt me axwe kêtã? Kati. Nãm me te kute kukràdjã kunĩkôt amijo ba ne kam axwe rã'ã. Kam Metîndjwýnh ta kabênkôt dja me ja kunĩ akuno. ¹¹Nhym kam me ajte me bakukãmãremã kum,

“Metĩndjwỳnh kute memã axwe kêt jarēnh nhym me arỳm kum mexja dja me tu amikajmã'ã markumrēx ne arỳm tĩn ne ar ba”, ane.

Ga, Metĩndjwỳnh kute memã axwe kêt jarēnhja pumũ. Me kute tu amim markumrēx kambit ne kute memã axwe kêt jarēnh. Kam me kute Mõjdjê kukràdjà marn kôt amijo baja te: axwe kêt prãmje. ¹²Nhym kam ajte pi'òkkam memã kum,

“Me kute Mõjdjê kukràdjà marn kôt amijo baja gê me prĩne kunĩkôt amijo ba mex”, ane.

Djãm pi'òkkam kabēn jakam ne memã, me kute tu amim Metĩndjwỳnh markumrēx jarē? Kati. Kute arēnh kêtumrēx. Nãm memã, kôt me kute amijo babit jarē.

¹³Nhym be, Metĩndjwỳnh ne memã Kritu jarē. Kritu arỳm pĩte'y'ã gwaj bajaxweo pãnh. Amrēbê ne Metĩndjwỳnh memã kum,

—Godja me Mõjdjê kukràdjà mar kêt ne katàt kukràdjà kunĩ: kôt amijo ba kêt, ba dja ba pãnh me kanga nhym me arỳm me biknor tokry djàkam akuno, ane. Tãm ne Metĩndjwỳnh amrēbê arē. Kam gwaj ba ne gwaj kôt amijo baba kêt ne bajaxwe:. Ga, gwaj bajaxwe pãnh Metĩndjwỳnh bit kute gwaj bakangaja pumũ.

Nhym be, kati. Jakam Kritu arỳm gwaj bajaxweo pãnh. Gwaj bakadry ne Kritu ta mãn axwe djwỳnh pyràk ne pĩte'ykam wajêt. Nhym kam Metĩndjwỳnh arỳm kute kanga pyràk nhym me biknor tokry djàkam biknor pyràk. Nãm ã anen pĩte'ykam wajêt ne arỳm gwaj bajaxweo pãnh. Amrēbê: ne Mõjdjê me bakukãmãremã kum,

“Me pi'ã me anhô nhym me arij. Nhym kam Metĩndjwỳnh arỳm me kanga nhym me arỳm me biknor tokry djàkam akuno”, ane.

Ga, Kritu pĩte'ykam jêtkam Metĩndjwỳnh kute kanga pyràkja pumũ.

¹⁴Kam, Jeju Kritu arỳm gwaj bajaxweo pãnh. Nhym kam Metĩndjwỳnh arỳm me bajtemo djuw mex ne arỳm memã axwe kêt jarē. Tãm ne Abraãomã arē. Gwaj tu amim Kritu markumrēx, nhym Metĩndjwỳnh Karõ arỳm gwaj bawỳr bõx. Amrēbê kute gwaj bamã Karõ jarēnhja arỳm gwaj bawỳr bõx. Ja kadjy ne Kritu gwaj bajaxweo pãnh.

Metĩndjwỳnh ne Abraãomã kabēn pỳnh ne arē.

Idja 6.13

¹⁵Akmere, àpnhĩre ar, ba ar amã pykakam me kukràdjà'õ jarē gar ama. Godja me'õ ar tu abenmã mỳjja'õ jarēnhkumrēx. Nhym me rũnh arỳm 'ã pi'òk no'òkkumrēx. Djãm kam ajte me'õ kute ijukri kabēn 'õ jarēnhmã? Nàr, djãm kam kute kabēn 'õo bingrànhmã? Arkati. Arỳm ne me tu 'ã pi'òk no'òk mãmđji. ¹⁶Abraãomã ne Metĩndjwỳnh apỳnh mỳjja jarēn kam kum kabēn pỳnh ne arēn kum,

—Dja ba ajo djuw mex ne atãmdjwỳo djuw mex, ane. Djãm kute kabēn jao bingrànhmã? Kati. Djãm tãmdjwỳ krãptĩ'ã ne kum, “Dja ba atãmdjwỳo djuw mex”, ane? Kati. Tãmdjwỳ pydjĩ'ã ne kum arē. Tãmdjwỳ ja ne kubê Kritu.

¹⁷Metĩndjwỳnh ne amrêbê: tu Abraãomã tãmdjwỳbê Krituja jarẽnhkumrêx. Nhyam kam tũ:mrãm, arỳm kute kum arẽnh'ã amexbê 430 apêxkam Mõjdjẽmã kukràdjà jarẽ. Djã ne kute Mõjdjẽmã me kukràdjà jarẽho kabẽn tũm japa? Djã ne kute amrêbê: Abraãomã tãmdjwỳbê Kritu jarẽnhja arỳm arẽnh kajgo? Arkati. Kute amrêbê: Abraãomã arẽnh kute mar tỳx rã'ã ne.

¹⁸Djã ne me kute Mõjdjẽ kukràdjà marn kôt amijo bakam axwe kêt ne ajte kute amim Kritu markam axwe kêt? Kati. Nhyam be, arỳm ne Metĩndjwỳnh mrãmri tu Abraãomã tãmdjwỳ Kritu jarẽnhkumrêx nhyam amim tu markumrêx nhyam arỳm kum axwe kêt jarẽ.

¹⁹⁻²⁰Nhyam be, mỳj kadjy ne Metĩndjwỳnh Mõjdjẽmã kukràdjà jarẽ? Bir, me kute amijaxwe mar ne kute kôt amim kator kadjy. Ja kadjy ne Mõjdjẽmã kukràdjà jarẽ. Me aben djô'ã abenmã arẽnh mō. Abenmã arẽnh mōr tãmtã arỳm tũmrãm Abraão tãmdjwỳ Kritu'yr o bōx. Me bakamingrãnyrekam Kritu arỳm katon ar ba. Nhyam kam me tu amim markumrêx nhyam Metĩndjwỳnh arỳm memã axwe kêt jarẽ. Metĩndjwỳnh ne Mõjdjẽmã kukràdjà jarẽ. Kadjy mrãnh djwỳnh kumrêxmã ne arẽ nhyam arỳm amũ Mõjdjẽmã arẽ nhyam amũ memã arẽ. Nhyam kam me krãptĩ amipãnh Mõjdjẽmã amijarẽ nhyam amũ Metĩndjwỳnhmã me arẽ. Nhyam be, djã nãm Metĩndjwỳnh me'omã Kritu jarẽ nhyam arỳm amũ Abraãomã arẽ? Kati. Metĩndjwỳnh pydji ne tu Abraão kuka kōnh djan kum tãmdjwỳbê Kritu jarẽ.

²¹Metĩndjwỳnh ne Abraãomã apỳnh mỳjja mex jarẽn kum tãmdjwỳbê Kritukôt axwe kêt jarẽ. Djã ne kam amikabẽn jao aknon kam memã kum,

—Dja ga me Mõjdjẽ kukràdjà man kôt ar amijo aba. Ba kam arỳm me amã axwe kêt jarẽ, ane? Kati. Dja me Mõjdjẽ kukràdjà man kôt ar amijo ban arỳm te axwe kêt prãmje ne Metĩndjwỳnhkôt tĩn ne ar ba kêt. Ne ren me Mõjdjẽ kukràdjà'ō man kôt ar amijo ban ren kam axwe kêt ne ren kam Metĩndjwỳnh kôt tĩn ne ar ba nhyam Metĩndjwỳnh ren kam memã kum,

—Dja ga me Mõjdjẽ kukràdjà man kôt ar amijo aban kam ajaxwe kêt, ane.

²²Nhyam be, kati. Me'ō ta te axwe kêt prãmje. Metĩndjwỳnh ne pi'ōkkam me kunĩ kupãnhhtã memã axwe jarẽ. Mỳj kadjy ne me kunĩmã axwe jarẽ? Bir, me kute tu amim Jeju Kritu markumrêx kadjy. Dja me tu amim markumrêx nhyam Metĩndjwỳnh arỳm memã axwe kêt jarẽ. Tãm ne amrêbê: me bakukãmãremã arẽnh pydji.

²³Nhyam be, amrêbê me bakukãmãre kute tu amim Kritu markumrêx kêttri ne me Mõjdjẽ kukràdjãkôt ar amijo ba. Me ta te: katormã ar amijo ba. Me kute mrãmri ne mebê ijêkam me ta te: katormã amijo ba pyrãk. Gwaj badjwỳ te bakatormã ari amijo baba. Nhyam kam tũmrãm me arỳm gwaj bamã Kritu'ã ajarẽ, gwaj arỳm tu amim markumrêx ne arỳm bakato. Bakaton arỳm gwaj ba ar baban bakĩnhkumrêx.

²⁴Kam, Mõjdjẽ kukràdjà ne kute me kra prĩre pumũnh djwỳnh pyrãk. Me bakukãmãre ne me kute me kra prĩre pyrãk. Ne kam me omũnh djwỳnh kôt ar amijo ba, Mõjdjẽ kukràdjà kôt ar amijo ba nhyam mebê tỳ:xi. Me kute aben djô'ã kôt amijo ba tãmtã nhyam kam tũmrãm arỳm Kritu me'yr bōx. Gwaj

bawÿr bôx gwaj arÿm tu amim markumrêx nhym arÿm tu gwaj bamã axwe kêt jarê. ²⁵Gwaj arÿm tu amim Kritu markumrêx. Djãm kam gwaj baje akubyn Môjdjê kukràdjà'ÿr amijo akêx prãm? Kati. Arÿm me abatànkhkam djãm akubyn kute amipumũnh djwÿnh prãm? Kati. Gwaj badjwÿ ne gwaj akubyn baje Môjdjê kukràdjà mar prãm kêt. Kritu ne gwaj tu amim markumrêx.

Mebê Metĩndjwÿnh kra'a ujarênh.

Dju r 1.12; Rô 8.14; Ep 1.5

²⁶Ar akunĩ ne gar arÿm abê Metĩndjwÿnh kra. Gar arÿm tu amim Kritu markumrêx ne arÿm abê Metĩndjwÿnh kra. ²⁷Me kute ngômã ar ajadjàr kunija, mÿj'ã ne ngômã ar ajadjàrja amijakre? Bir, Kritumê ne gar atypdji. 'Ã ne amijakre. Gar kam arÿm aje Kritu pyræk. Kritubê Metĩndjwÿnh Kra. Ar gadjwÿ ne gar Kritu kôt abê Metĩndjwÿnh kra.

²⁸Djãm kam dja gar ajô aben mÿr jabej memã kum, “Ibê idjaer”, ane? Nàr, “Ibê me bajtembê kregu”, ane? Nàr, gar ajô aben mÿr jabej memã kum,

—Nãm me ipa 'amÿ ba me kabênkôt kajgo ari idjâpênh tÿxo iban idjumar punu, ane? Nàr,

—Me kute ipa 'amÿnh kêt ba arek mekôt ar iban idjumar mex, ane? Nàr gar ajô aben mÿr jabej memã kum, “Imy”, ane, nàr, “Ini”, ane? Djãm aje amim Kritu markam aje aben mÿr jabej ã abenmã anhÿro abamã? Kati. Ar aje amim Kritu markam ne ar akunĩ abeno anhôbikwan apydji:i. ²⁹Ne, ar abê Kritu nhôbikwakam Metĩndjwÿnh arÿm ar ajo Abraão tàmdjwÿ. Kute ar anhingêt Abraãomã kabên pÿnh ne arênhja kunĩ ne ajte ar amãdjwÿ arê. Dja gar arÿm Abãm nhô mÿjjao aminhõ. Metĩndjwÿnh nhô mÿjjao aminhõ.

Metĩndjwÿnh gwaj bajo kra.

4 ¹Jakam ne ba ar amã arê, me abê Garaxakam me jamã arê, gar ama. Me kra prĩre ne me kute bãm nhô nèkrêx kunĩo bamã te o ane. Prĩrekam kute o ba kêt rã'ã. Nãm me kute bãm nhô àpênh kajgo pyræk ne kajgo: ne. ²Nhym kam me omũnh djwÿnh me prĩre jamã mrãnh mex'ã karôn me omũho ba nhym me kam kôt amijo ba. Nãm me prĩre pumũnh djwÿnh meo ba: nhym me arÿm abatànkh ne. Nhym me bãm kute ô akati jarênhja arÿm bôx nhym kam me arÿm bãm nhô nèkrêxo aminhôn o ba.

³Gwaj badjwÿ Kritu bôx kêttri ne gwaj baje me prĩre pyræk. Gwaj baje me àpênh kajgo pyræk ne gwaj bakajgo: ar baba. Nhym me kute gwaj bamã pykakam me kukràdjà jarênh gwaj ajbit maro baba. Kute mrãmri ne me prĩre pumũnh djwÿnh me prĩremã mrãnh mex'ã karôo ba nhym me kute kôt amijo baja pyræk. Gwaj badjwÿ gwaj pykakam me kukràdjâkôtbit amijo baba.

⁴Nhym be, kam arÿm ô akati bôx nhym Metĩndjwÿnh arÿm pykamã Kra jano nhym me'ô nire kurũm kato. Katon arÿm Môjdjê kukràdjà man kôt ar amijo ba. ⁵Mÿj kadjy ne Môjdjê kukràdjà man kôt ar amijo ba? Bir, kute gwaj bajaxweo pãnh kadjy. Gwaj te Môjdjê kukràdjâkôtbit amijo baban mã bajaxwe:.

Nhym Kra arým gwaj bajaxweo pãnh nhym kam Metĩndjwýnh arým gwaj bajo kra. Ja kadjy ne Kra arým ruw ne Môjdjê kukràdjà man kôt ar amijo ba.

⁶Kute gwaj bajo krakam ne arým gwaj bamã Kra Karõ jano nhym arým gwaj bakam nhýn gwaj bajo ba. Gwaj kam amikam Karõ ma nhym arým gwaj bakadjwýnhbê Metĩndjwýnhmã kum, “Aba, Aba”, anhýro nhý. Me kabên djwýnhkam kum, “Aba, Aba”, anhýro nhý. Me bakabênkam ne Karõ ren arên ren kum, “Djünwã, Djünwã”, anhýro nhý. ⁷Ga, me kute me pa 'amýnh nhym me memã àpênh kajgo ar baja pumũ. Amrêbê ar gadjwý ne gar Môjdjê kukràdjà man kôt amijo aba kajgo. Ne jakam arým Môjdjê kukràdjà kôt amijo aba kêt. Kritu ar akadjy ty nhym Metĩndjwýnh kute ar ajo krakam. Dja ar amã õ mýjja ngã gar o aba.

Me kute akubyn me kukràdjào ba prãm.

A Kô 11.3; Kor 2.16; Ped k 1.14

⁸Be, ar abê me bajtem ne gar amrêbê ar aje Metĩndjwýnhkumrêx mar kêt ne kôt amijo aba kêt. Apýnh mýjjao metĩndjwýnh karõ nhipêxjamã ne gar adjàpênh tỳx kajgo aba. Djãm mrãmri ne kubê Metĩndjwýnhkumrêx? Arkati. Gar o aban aje mrãmri ne me pa 'amýnh nhym me memã àpênh tỳx kajgo ba ne te apôx prãmje ja pyræk.

⁹Nhym be, jakam ne gar arým aje Metĩndjwýnhkumrêx mar. Djãm ar ga ne gar amim mar? Kati. Ta kumrêx ne kute ar amarn arým ar amã amijo amirít gar kam kôt arým amim maro aba. Arým ar aje Metĩndjwýnhkumrêx mar jakam mýkam ne aje akubyn me kum Metĩndjwýnh kính kêtja kukràdjà marn kôt amijo aba prãm? Gar me kukràdjà kôt ar amijo aban te ajaxwe kêt prãmje. Kam ar arerekre. Me kukràdjà kajgo. Dja gar kôt ar amijo aban arým aje mrãmri ne me pa 'amýnh nhym me memã àpênh kajgo ba pyræk.

¹⁰Ar aje mýjja kajgo kadjy adjàpênh tỳx prãmkam ne gar apýnh akati krãptĩkam me kukràdjà man arým abenmã kum,

—Akati ja dja gwaj 'ã bano tỳx ne Môjdjê kukràdjà kôt bamex, anen ajte apýnh mytyrwý'ã abenmã kum,

—Mytyrwý ja dja gwaj 'ã bano tỳx ne me kukràdjà kôt bamex, anen ajte abenmã kum,

—Dja gwaj bàygogo djê pan ajte Môjdjê kôt akati ja ma, anen ajte abenmã kum,

—Dja gwaj amex ja'ã bano tỳx ne Môjdjê kukràdjà kôt bamex, ane.

Dji:jæk. Djãm me kukràdjà kajgoja kräre got? Djãm ar aje ã amijo anhýrkam Metĩndjwýnh kute ar amã ajaxwe kêt jarênh gar kum amex got? ¹¹Amrêbê ba me abê Garaxakam Kritu jarênho iban idjàpênh kume:x. Ar akam idjàpênh kajgo gar aje Kritu mar kajgo karõ ne ba ar ajã idjàpnhĩx ne axwe idjumar ne.

¹²Akmere, àpnhĩre ar, on ar ikudjwa. Ba ne ba ije ar apyræk. Djãm ba ne gar ijo ajkê, ba ar amã ikabên? Kati. ¹³Nhym be, amrêbê ije ar amã Kritu'ã ajarê gar ama. ujarênh ny jarênh kutewa. Kamã ne ba ikanên ar amã Kritu'ã ajarê gar ama.

¹⁴Nãm itokry te ijo ba djãm kam ne gar amã ikurên ikanga? Kati. Nã gãm ar

prïne imar mex. Nã gãm ar ijo Metĩndjwýnh kadjy mrãnh djwýnh pyræk nàr ijo Kritu Jeju pyræk ne ar amã ikĩ:nh ne. ¹⁵Ba ino kanê: gar te aje ikadjy ano kadjàr ne pãnh imã ano jadjàr ba ikanê kêt mã. Ba ne ba 'ã ar apumũn arým ar amã arê. Ar amã ikĩnh. Mýj ne gar arým jakam amijon? ¹⁶Djãm ije katàt ar amã Metĩndjwýnh kabên jarênhkam gar arým ijo akurê djwýnh?

¹⁷Be, wãkam me'õ ar kute amiwýr ar ajo akêxmã àpênh kume:xo ba. Djãm me kute ar ajo mex kadjy? Kati. Me kute ar abê ikurê mã. Dja me ar abê ikurê gar kam arým mekôt ar amijo aban arým me kukràdjà'ã ano tỳx ne ar o aba. Ja kadjy ne me ar abê ar ikurêo ba.

¹⁸Ne ren me kute ar ajo mexmã àpênh kumex ne ren kam mrãmri mexkumrêx. Ar akam idjãmkam ne me ren ar ajo mexmã àpênh kumex ne ren ajbubê itým kamdjwý ren ar ajo mexmã àpênh kumex ne kam ren mrãmri mexkumrêx. Nhym be, kati. Me kute ar abê ikurê kadjy ne me àpênh kumex.

¹⁹Ba ne ba imã ar ajabê:ê kute mrãmri ne me kum kra prĩre jabêja pyræk. Ije me'õ nire kra àkam umar punure pyræk ne ar akam idjumar punu:re. Me'õja amijo 'êx ne Kritu kupa'ã ar amã arê ba ar ama:ro iba. Nok gar ren kabên man Kritu kupa'ã amijo tẽ. Ga, me prĩre kute nã tikkrekam aminhipêxo baja pumũ. Nãm aminhipêxo ba:n arým prĩne aminhipêx nhinomã kumê. Ar gadjwý. Dja gar prĩne Kritu kôt amexo amũ amikamênho tẽ. Amikamênho tẽ:n kam arým prĩne Kritu mexo amex. Tãm ne ba imã kĩnh. Nã bãm ar ama:ro iba. ²⁰Ar awýr ibôx prãm kam ne ba dja. Ne ba ren inhýtã ar awýr bôx. Djã ne ba ren kam ar amã ibên tỳx? Kati. Kam ne ba ren ar amã ibên rerekbito ikabên. Nhym be, kati. Amybým ne ba axwe ar akam idjumar ne.

Agaremẽ Xara'ã ujarênh.

²¹Dja gar jakam imã arê. Ar aje Môjdjê kukràdjà marn kôt amijo aba prãmja mýkam ne gar amikadjy kukràdjà kunĩ mar kêt? ²²Ba ar amã kukràdjà jarê gar ama. Môjdjê ne kute 'ã pi'òk no'òkkam memã Abraão kra amãnhkrut'ã ajarê. Kra ja ne Abraão ò àpênh kajgobê Agaremã kudji. Agare ne kubê me pardja. Nãm Abraão mã àpênh kajgobit ar ban umar punure. Ò àpênh kajgo jamã ne kra ja dji. Nhym be, prô djwýnhbê Xaramã ne kra djwýnhja dji. Prô ja ne kubê me pardja kêt ne ta arek mekôt ar ban umar mex.

²³Nhym kam Abraão ta ne Xara kute kum arênhkôt me pardjajamã kra ja dji nhym kumrêx ruw. Nhym be prô djwýnhmã kute kra djwýnh djirja ne Metĩndjwýnh kabênkôt. Metĩndjwýnh ta kute kum kra jarênh kôt ne Abraão arým prôbê Xaramã kudji. Kute kum, “Dja akra'o amirĩt”, anhýr kôt arým kum kudji. Xara kubê me pardja kêt ne ta arek mekôt ar ban umar mexkumrêxjamã ne kudji nhym kam ruw.

²⁴Mýkam ne ba ar amã ar nire abenkôt kra rwýkja'ã ajarê? Mýj'ã ne ar nireja amijakre? Bir, ar amãnhkrut Metĩndjwýnh kabên amãnhkrut'ã amijakre.

Ba ar amã kabên jarê gar ama. Metĩndjwýnh kute Abraão mã kabên jarênhkam ne kum Kritu jarê. Kritu'ã ne Xara amijakre. Nhym be, Môjdjê kukràdjà'ã ne

Agare amijakre. Be, kabên amãnhkrut ne ja. 'Ā ne ar nire amãnhkrut amijakre. Metĩndjwýnh ne krãnhbê Xinajkam Môjdjêmã me kukràdjàja jarẽ. Me kukràdjàja kôt ne me àpênh tỳx kajgobit ar ban te axwe kêt prãmje. Krãnhbê Xinaj'ã ne Agare amijakre. Agare ne kubê me pardja ne Abraãmã àpênh tỳx kajgobit ar ba. ²⁵Agare'ã ne krãnhbê Xinaj amijakre. Pykabê Arabijkam ne krãnhbê Xinaj. Nhyam kam Xinaj'ã ne pykakam krĩraxbê Djeruxarēja amijakre. Djeruxarê jakam me ar ba ne me kute Môjdjê kukràdjàbit mar. Me kute Môjdjê kukràdjàbit mar ne me àpênh tỳx kajgobit ar ban te axwe kêt prãmje.

²⁶Nhyam be, me kute amim Kritu mar ne me kàjkwakam Djeruxarêkam ar ba. Me ja ne me kute Môjdjê kukràdjà marn kute kôt amijo baja kangan Kritubit kôt ar amijo ba. Kôt ar amijo ban kubê me pardja kêt ne ta arỳm arek mekôt ar ban umar mex ne. Kàjkwakam Djeruxarê ne kute me banã pyrāk.

²⁷Ga, Metĩndjwýnh amrêbê: kute me bakukãmãremã kabên jarênh nhyam me arỳm kute 'ã pi'òk no'òkja pumũ. Nãm Metĩndjwýnh tu krĩraxbê Djeruxarêmã kabên jarẽ. Nãm tu kum,

“Ga te akra prãmje ne akra kêtumrêxja on akĩnh. Aje akra à mar kêtja on tu adjãmra tỳx kaba.

Djãm mrãmri akra kêt ne ar abamã, amjên kute akangakam akra kêt ne ar abamã? Kati. Dja me arỳm mjênja te akurãm kra krãptĩ ga dja ga akra krãptĩ me akrenh mex ne.”

Nãm ã kàjkwakam krĩraxbê Djeruxarêjamã ane. Ga, kàjkwakam krĩraxbê Djeruxarê kute mrãmri ne gway bakunĩ nã pyrākja pumũ. Arỳm gway bakrãptĩn tu amim Kritu markumrêx nhyam Metĩndjwýnh arỳm tu gway bamã axwe kêt jarẽ.

²⁸Ga, Metĩndjwýnh kute Abraãmã kum, “Dja akra amirit”, anhỹra pumũ. Nhyam kam kute kum arênh kôt arỳm Idjak kato. Ar gadjwý ne gar aje Idjak pyrāk. Mỳkam? Bir, Metĩndjwýnh ne ar amã,

—Dja gar tu amim Kritu markumrêx. Ba kam arỳm ar amã axwe kêt jarênh arỳm ar ajo ikra, ane. Gar kam arỳm tu amim markumrêx nhyam kute ar amã arênh kôt arỳm ar ajo kra. Kute Abraãmã arênh kôt ne arỳm kra Idjak kato. Ar gadjwý kute ar amã arênh kôt ne arỳm ar amã axwe kêt jarênh arỳm ar ajo kra.

²⁹Nhyam be, amrêbê: Imaêr kum Idjak kurêo ba. Metĩndjwýnh Karô kabên kôt ne Abraão arỳm kra Idjak dji nhyam katon ar ba nhyam Imaêr kum kurêo ba. Abraão ta ne Imaêr dji nhyam arỳm kum kamybê Idjak kurêo ba. Nãm ã akati jakam me kum gway bakurêo ane. Me kute amim,

—Dja ba Môjdjê kukràdjà man kôt ar amijo iban arỳm ijaxwe kêt, anhỹro baja. Me ja ne me kum gway bakurê. Kum gway baje amim Kritu marja kurêo ba. Gway baje amim Kritu mar ne gway amim,

—Dja ba tu amim Kritu markumrêx nhyam Metĩndjwýnh arỳm imã ijaxwe kêt jarẽ, anhỹro baba. Gway anhỹro baba nhyam me arỳm kum gway bakurêo ba.

³⁰Nhyam kam mỳj ne amrêbê: me bakukãmãre arê nhyam me'ã pi'òk no'òk ne? Bir, Xarabê me pardja kêtja ne Agare'ã Abraãmã kabên ne kum,

“Djãm gu banhõ àpênh kajgo kraja kute ikra kôt anhõ mỳjjao aminhõmã? Amỳrbê kute o aminhõmã?

Kati. Ikrabit dja anhõ mỳjjao aminhõ. On ikra nêje bõm Agaremẽ kra ar amẽ.”

Nãm ã Xara Abraãomã ane. ³¹Ar tãm 'ã dja gwaj amijakren amima. Me kute amim,

—Ba Môjdjê kukràdjà man kôt ar amijo iban ijaxwe kêt, anhỹrja ne me te axwe kêt prãmje. Nãm me me pardja kra'ã amijakre ne àpênh kajgo ar ba. Dja me Metĩndjwỳnh nhõ mỳjjao aminhõ kêt ne axwe rã'ã. Nhym be, gwaj ba ne gwaj tu amim Kritu markumrẽx nhym Metĩndjwỳnh arỳm tu gwaj bamã axwe kêt jarẽ gwaj arỳm kum bajaxwe kêt. Gwaj ba ne gwaj me pardja kêt kra'ã amijakre ne kam Metĩndjwỳnh nhõ mỳjjao aminhõ.

Pykakam me kute kukràdjà kajgo kôt amijo ba nêje me akre.

Rô 3.21; Kor 2.20

5 ¹Gwaj ba: arek mekôt ar baban badjumar mex kadjy ne Kritu arỳm gwaj bapytà. Ga, mryti kute jênh pytĩ tur ne kute o baja pumũ. Gwaj badjwỳ amrêbê: gwaj pykakam me kukràdjà kôt badjàpênh tỳx kajgobit ar baba. Kam ne gwaj badjumar punu:re. Nhym Kritu arỳm gwaj bapytà gwaj arỳm me kukràdjà kôt badjàpênh kêt. Gwaj ba ne gwaj Kritukôt arek ar baban badjumar mex. Arỳm Kritu kôt badjumar mexkam kwãrĩk wãnh Môjdjê kukràdjà'ỳr amijo akẽx kêt ne kôt amijo aba kêt. Dja ga kôt ar amijo aban arỳm akaprĩ:re kute mrãmri ne mry jênh pytĩkam kaprĩ pyrãk. Gê me te: kukràdjà'ã ar amã karõ gar arek mebê dja. Kritu kôt dja gar adjãm tỳx.

²Ba ibê Paur ne ba me abê Garaxamã arẽ. Godja gar aje memã kum,

—Ajrã. Môjdjê kukràdjà kôt imy nhinhu kã krãta. Dja ba kôt ijaxwe kêt, anhỹr jabej nhym me amy kã nhinhu krãta gar kam arỳm aje Kritu mar kajgo. ³Ba ajte mrãmri me kunĩmã arẽnhkumrẽx. Metĩndjwỳnh ne arỳm me my kã rênhamã kute prĩne Môjdjê kukràdjà kunĩ kôt amijo bamã memã arẽ.

⁴Ar ajõ ar aje amim,

—Ba Môjdjê kukràdjà man kôt ar amijo iban arỳm ijaxwe kêt, anhỹr. Ar aje amim anhỹrkam aje Kritu mar kajgo. Nhym kam Metĩndjwỳnh kum ar akaprĩ kêt ne arỳm ar amã axwe jarẽ. Ar ga ne gar Kritu bê amijo akẽx.

⁵Nhym be, gwaj ba ne gwaj arỳm tu amim Kritu markumrẽx. Nhym kam Metĩndjwỳnh arỳm Karõ kôt gwaj bajo mex. Dja Karõ gwaj bajo ban arỳm gwaj bajo mex gwaj kam bakunĩ bajaxwe kêt. Tãm ne gwaj tu amiwỳr kamnhĩxkumrẽx. ⁶Be, Kritu kôt gwaj baje amijo babakam djãm Metĩndjwỳnh kute gwaj bamy kã rênh mar? Nàr djãm kute gwaj bamy kã tã mar? Kati. Ja ne kum kajgokumrẽx. Nhym be, gwaj baje tu amim Kritu markumrẽxkam. Kambit ne gwaj mrãmri kum bakajgo kêtumrẽx ne kum bajaxwe kêt. Ne baje tu amim markumrẽxkam arỳm bamã me abêkumrẽx.

⁷Amrêbê ne gar aje mrãmri ne me rer djwýnh prôt mex pyræk. Ne katàt Kritu kôt ar amijo aban 'ã adjukanga kêtukumrêx. Mýj me'ô ne ar abê aptà? Gar kabên katàt man kôt ar amijo aba nhym ar abê aptà? ⁸Djãm Metĩndjwýnh kute amiwýr ar ajwýr djwýnh ta ne ar abê aptà? Djãm ta ne Môjdjê kukràdjà'ã ar amã karôn o ar abê aptà? Kati. Atemã me'ô.

⁹Ga, me kute djwýkam igot djà kryre rênha pumũ. Nhym kam arým djwý djôm mẽ amrà. Ar gadjwý ne me ngrêre ar amã 'ã karôo dja. Dja me arek ar amã 'ã karôo dja: nhym me kabên ar anhĩ kunĩ mẽ amràn arým me'ýr ar ajo akêx gar arým mekôt ar amijo aba. ¹⁰Nhym be, arým ne gar aje ikabên ja markam ba tu amim ar akamnhĩxkumrêx ne amim,

—Kati. Jakam dja ar ikabên man Kritu kôtbit amijo ba, ane. Nhym be, me'ô ja kute Môjdjê kukràdjà'ã ar amã karôn ar amã kaprĩ jadjárja gêdja Metĩndjwýnh arým kum axwe pãnh jarê.

¹¹Nhym me we ar amã,

—Paurdjwý ne me my kà rênh'ã memã àpnênho ba, anhýro ba. Djãm mrãmri me kabên? Kati. Ba ne ba kàj bê memã kum,

—Kritu ne pĩte'ykam ty. Dja ga me tu amim markumrêx, nhym Metĩndjwýnh arým tu me amã axwe kêt jarê ga me kum ajaxwe kêt, anhýro iba. Ne ba ren iby ajte memã kum,

—Gê me me amy kà rênh gê kam arým Metĩndjwýnh me amã axwe kêt jarê, anhýro iba nhym ren me kum ikurê kêt. Nhym be, kati. Nã bãm memã kum,

—Kritu ne pĩte'ykam ty. Dja ga me tu amim markumrêx nhym Metĩndjwýnh arým tu me amã axwe kêt jarê, anhýro iba. Jabit ne ba memã arê. Ne kam ije me my kà rênh'ã memã karô kêt. Kam ne me arým ijo bikênho ba. ¹²Be, me kute ar amy kà rênh'ã ar amã karôn ar amã kaprĩ jadjárja ren ta ã amijo bikênho ane.

Me kute Metĩndjwýnh Karô mar'ã memã karô.

Idja 13.3; Ped k 1.22; Dju k 3.11

¹³Kam, akmere àpnhĩre ar, djãm ar aje Môjdjê kukràdjà marn kôt amijo aban ar akaprĩmã ne Metĩndjwýnh amiwýr ar ajuw ne ar ajo ba? Kati. Ar adjumar mex ne arek mekôt ar abamã. Ja kadjy ne Metĩndjwýnh amiwýr ar ajo akêx. Ar aje Môjdjê kukràdjà kôt amijo aba kêt ne arek mekôt ar abakam djãm kam arým tu ajaxwemã? Djãm aje amidjwýnhbito kĩnh kadjy tu ajaxwemã? Kati. Kwãrĩk wãnh ajaxwe kêt. Arým aje Môjdjê kukràdjà mar kêt ne arek mekôt ar abakam dja gar amã aben jabên abenmã apê.

¹⁴Mýkam? Bir, Metĩndjwýnh ne memã kum,

“Me amã amibu'ã me ja jabê. Kute mrãmri ne ga me amã amijabêja pyræk dja ga me ã amã amibu'ã me ja jabêo ane”, ane.

Dja gar Metĩndjwýnh kabênja pydjibit man kôt ar amijo aban arým Môjdjê kukràdjà kunĩ man kôt amijo aba. Mrãmri ar amã me abêkam ne gar tu Metĩndjwýnhmã amexkumrêx.

¹⁵Nàr kon dja gar amã aben kurêo aba mỳj dja kam akute? Ga, ropre kute aben kamjãnh ne kute abeno apêxo baja pumũ. Ar gadjwỳ dja gar amã aben kurê tãmtã ĩ arỳm aben bê akunĩ ajmã.

¹⁶Gwaj ba, bamã amidjwỳnhbito kĩnh prãm ne kôt arỳm bajaxwe prãm. Nhym be, dja gar amim Metĩndjwỳnh Karõ man mã kôt ar amijo aban kam arỳm kôt ajmã akute kêt ne katàt amijo aba.

¹⁷Djãm ar ga ne gar Metĩndjwỳnhmã ajaxwe kêt? Kati. Gwaj ba ne gwaj bajaxwe prãm ne amim, “Ba amidjwỳnhbito kĩnh”, anhỹro baba. Nhym kam Metĩndjwỳnh Karõ mã gwaj bamã,

—Kati. Kwãrik wãnh, anen ã akubyn gwaj banêo ane. Karõ mã akubyn gwaj banê gwaj ba bajaxwemã mã amim, “Ba amidjwỳnhbito kĩnh”, anhỹro baba. Gwaj mã bakabẽno Metĩndjwỳnh Karõ japanho baba. Nhym ta mã akubyn gwaj banêo ba. Kam ar ga ne gar te ga: ajaxwe kêt prãmje.

¹⁸Nhym be, ar ga dja gar amim Metĩndjwỳnh Karõ man mã kôt ar amijo aba nhym kam ta arỳm katàt ar ajo ba. Dja gar amim Karõ maro aba:n arỳm amã Mõjdjê kukràdjà maro aba prãm kêtikumrêx.

Me kute amidjwỳnhbito kĩnh prãm kam apỳnh axwe djàri 'ã ujarênh ne ja.

¹⁹Me kute amidjwỳnhbito kĩnh prãm kam ne me apỳnh mỳjjao ban kôt axwe. Me kute apỳnh mỳjjao baja ne me kunĩ kute mar.

Nãm me mebê prõo akĩ, mjêno akĩ.

Ne ajte ari prõ, mjên kupa'ã kurê ba.

Ne ajte kute abenbê me kupêho amijo àpnuo ba.

Ne ajte amijo àpnu me:x ne.

Me kute amidjwỳnh kĩnh prãm kam kute mỳjjao ba ne ja.

²⁰Ne ajte mỳjjao metĩndjwỳnh karõ nhipêxmã amijarêho ba.

Ne ajte ta apỳnh mỳjja maro amiptàn arỳm amijo wajangao ba.

Ne ajte kum me kurêo ba.

Ne ajte axikôt kabên kêt ne abenã kabên ba.

Ne ajte me õ mỳjja pro'ã ngryk ba.

Ne ajte kute amijã ngryk nê kêt ne tu ngryk ba.

Ne ajte kute amidjwỳnhbit markam amijo rax pytãro ba.

Ne ajte kute amiwỳr meo akêx prãmje aben bê me kurêo ba.

Ne ajte apỳnh mỳj kukràdjaja'ã no tỳx ne kam mỳr jabej apỳnh me kwỳ djàri kôt bikprõnh ba.

Me kute amidjwỳnhbito kĩnh prãm kam kute mỳjjao ba ne ja.

²¹Ne ajte te kute me uràk prãmje ngryk ba.

Ne ajte aben paro ba.

Ne ajte kadjwati kangôkam^b bibãnh ba.

^b 5.21 Mỳjja me kute o kôm ne kôt bibãnh kunija, kadjwati kangômê uba kangômê, mỳjja kangô kunĩ ne me kum kadjwati kangô jarê.

Ne ajte ap̃nh m̃yja punukam aben t̃yx jabejo ba.
 Be, ap̃nh m̃yja kute ja pyrāk rā'ā. Me kute amidjw̃nhbito k̃nh
 prām̃kam kute m̃yjjao ba ne ja. Dja Met̃indjw̃nh ĩ ō me ja kuñio ba.
 Djām kam kute me jao bamā? Me kute m̃yja jao ba, djām kute meo
 bamā? Kati. Dja me ja wānh me biknor tokry djākam akuno. Tām ne ba
 amrēbē ar amā arēn ajte jakam ar amā arē.

Met̃indjw̃nh Karō kute meo bakam me kute amijo ba mex.

22Nhym be, dja Met̃indjw̃nh Karō ta ar ajo ba.

Gar ar̃ym ô'ā amā me abē.

Ne ajte ak̃nh̃tire.

Ne ajte adjumar mex.

Ne ajte memā ano kator kêt ne amijamār 'iry.

Dja Karō ta ar ajo ba gar ajte ô'ā memā aprī.

Ne ajte anhōdjānh.

Ne ajte katāt Met̃indjw̃nh kabēn man kôt ar amijo aban 'ā adjukanga kêt.

23 Ne ajte akabôt katin ar aba.

Ne ajte amijaxwe kêt kadjy amijāno dja.

Dja Karō ta ar ajo ba gar ar̃ym ā amijo anen kam Met̃indjw̃nh kôt amijo aba
 mexkumrēx nhym ar̃ym ar akam k̃nhkumrēx ne ar amā ar akatāt̃kumrēx jarē.

24Kritu kute gwaj bajo aminhōkam gwaj ar̃ym bamā bajaxwe prām̃ kêt.
 Baje amidjw̃nhbito k̃nh kadjy bajaxwe prām̃ kêt. Baje mebē me kupēnh
 prām̃ kêt ne bamā m̃yja punu prām̃ kêt. Baje mrāmri ne Kritumē ro'ā
 aktā banhikra, baparmo i'êk pyrāk. Gwaj ā amimaro ane.

25Mrāmri Karō kute gwaj bajo ba jabej gwaj mā Karō man pr̃ne kôt
 amijo baba mex. 26Kwārīk wānh gwaj bakajgokam arīk amijo badjāmra
 ar baba kêt. Dja gwaj amijo badjāmra ar baba:n ar̃ym abenmā aben
 kurê'uko baba. Ne aben rax m̃yr jabej aben kam bangryko baba.

Me kum me kunī kaprī'ā kute memā karō.

6 1Akmere ap̃nh̃ire ar, godja me'ō ar̃ym axwe nhym me ar̃ym kute
 kôt om̃nh̃ jabej. Ar ga aje amim Met̃indjw̃nh Karō maro abaja dja
 gar me'ōmā apr̃iren akubyn Met̃indjw̃nh'yr o akēx. Ne amiman amim,
 —Ÿ, wat̃ire. Nok ba ren akati 'ōkam Met̃indjw̃nh maro aknon ren ā
 kudjwa ijaxweo anh̃yr jabej, ane. Dja gar ā amimaro anen ajaxwe nêje
 amijāno djan ar̃ym me'ōjamā apr̃iren akubyn 'yr o akēx jabej.

2Ga, me kute jēnh pyt̃io baja pumū. Nhym me ar̃ym 'yr bōx ne ar̃ym
 kum kapr̃in kôt o kangō. Ar gadjw̃y dja gar aben maro aba nhym me'ō
 amikam kapr̃ire. Ar amā kapr̃in kum kaprī kw̃y ngri. Dja gar ā anen
 ar̃ym aje Kritu kukrād̃jā marn kôt amijo aba mexkumrēx.

3Nhym be, godja ajō katāt aje amijo aba kêt̃kam mā amim,

—Djām ba ijaxwe? Kati. Ijaxwe'ō kêt-kumrêx, 'it'yx, anhÿro aba jabej. Djām mrāmri ne akabên? Kati. Ga ne ga amim ajêx ne aminoo abiknoro aba.

⁴Ar akunĩ apÿnh anhĩ djàri gar mrāmri katàt aje amijo aba jabej ga: amikabi. Ne kam mrāmri katàt aje amijo abakam ga amikam akĩnh. Nhyim be, djā ne aje amim,

—Ba ne ba ije katàt amijo ibao tām-wā jakrenh, anhÿro abakam djām mrāmri akatàt? Kati. Ar aje ā amim anhÿro abakam akatàt kêt-kumrêx. ⁵Nhyim be, ar akunĩ apÿnh anhĩ djàri dja gar goja mrāmri akatàt-kumrêx jabej katàt amijo aba.

⁶Be, dja Metĩndjwÿnh kabên jarênh djwÿnh ar amā kabên jarênho ku'ê, ar amikutā kum ar anhō mÿjja mex kwÿ ngā. Kum angā gē ar akôt o amikĩnh.

⁷Djām me kute Metĩndjwÿnh'ā abenmā kum,

—Djām mrāmri dja Metĩndjwÿnh memā axwe pānh jarê? Kati. Kabên kajgo. Me ākĩnhikam pānh kêt. Me 'êxnhikam pānh kêt. Me axwe kunikam pānh kêt, anhÿr? Djām me kute anhÿrkam mrāmri me kabên-kumrêx? Kati. Kwārĩk wānh amim ajêx ne aminoo abiknor kêt. Ga, mrÿnhĩ 'y, akrô 'y, akaôk 'y, 'ê 'ôdjwÿ 'yja pumũ. Djā ne ren me 'y ja kren ren kôt djwÿ mex jamÿ? Kati. Me kute 'y mexbit krekam kute kôt djwÿ mex jamÿnh.

⁸Gwaj badjwÿ. Godja gwaj amidjwÿnhbito kĩnh kadjy bajaxwe jabej, badjākĩnhĩo baba jabej, bakabên punuo baba jabej. Metĩndjwÿnh dja pānh gwaj bamā mÿjja punu ngā gwaj arÿm bakapri:re. Dja gwaj baje me kute mrÿnhĩ 'y kren arÿm kapri pyrāk. Nār, godja gwaj amim Metĩndjwÿnh Karō man katàt kôt ar amijo baba, Metĩndjwÿnh Karō dja arÿm gwaj bamā o pānh. Pānh dja gwaj arÿm kôt batĩn ne ar baba rā'ā: rā'ā ne.

⁹Kam dja gar adjukaprin katàt aje amijo aba'ā adjukanga kêt. Dja gar ā anen ĩ arÿm amim akĩnh djā byn akĩnh-kumrêx. Kute mrāmri ne me kute bāygogo djê parkam me kĩnh pyrāk. ¹⁰Pykakam mekôt ar abari dja gar amā me kunĩ kapri. Dja gar me kute amim Jeju marja kumrêx aman amā me kaprin kam amā me kunĩ kapri.

Metĩndjwÿnh kute meo nykambit kĩnh.

¹¹Ga, ba inhikrakam ije ar amā pi'ôk no'ôkkam ije no'ôk rũnhja pumũ.

¹²Me ar amy kà rênh'ā ar amā àpnênho ba. Dja gar me kabên kôt ar amy kà rê nhyim amũ me ja arÿm me'ā abenmā kum,

—Be, me Môjdjê kukràdjā'ā no tÿx-kumrêx. Me mex-kumrêx, ane. Ja kadjy ne me ar amy kà rênh'ā ar amā apnê. Ne ren 'ā ar amā àpnênh kêt nhyim ren me 'ā kum me kurêo ba. Nhyim ren me Kritu pĩte'ykam jêtbit'ā ar amā ajarê nhyim ren me 'ā kum me kurêo ba. Nhyim be, kati. Nām me ar amy kà rênh'ā ar amā àpnênho ba nhyim me arÿm kum me kĩnh. ¹³Djām me arÿm my kà rênhkam kute mrāmri Môjdjê kukràdjā marn kôt amijo bakumrêx? Kati. Ne kam mÿj kadjy ne me ar amy kà rênh'ā ar amā apnê? Bir, dja me amiwÿr ar ajo akêx ne 'ā amidjwÿnhbito amran memā kum,

—Be, arým ar me bakukràdjà kôt ba mexkumrêx. Ba ne ba 'ÿr aro akêx, ane. Ja kadjy ne me ar amy kà rênh'ã ar amã àpnênho ba.

¹⁴Nhym be, djã ne ba ba: amijo idjãmra prãm? Kati. Běnjadjwÿr djwÿnhbê Jeju Kritu ne ba o idjãmra prãm. Kute gwaj bajaxweo pãnh kadjy ne arým pĭte'ykam ty. Tãm ne ba o amra. Pĭte'ykam tykkam Metĭndjwÿnh arým imã ijaxwe kêt jarê. Kam, me kum Metĭndjwÿnh kĭnh kêt kukràdjàja ba arým kanga. Ga, me arým tykkam kum mÿjja kĭnh kêtja pumũ. Badjwÿ imã me kukràdjà kĭnh kêt. Me kum Metĭndjwÿnh kĭnh kêt kukràdjàja imã kĭnh kêt. Ba Kritumẽ ro'ã pĭte'ykam arým ityk pyræk ne imã me kukràdjà kĭnh kêt.

¹⁵Be, arým gwaj baje tu amim Jeju Kritu markam djãm Metĭndjwÿnh kute gwaj bamy kà rênh mar nàr djãm kute gwaj bamy kà tã mar? Kati. Mÿjja ja ne arým kum kajgokumrêx. Nhym be, gwaj arým tu amim markumrêx nhym arým gwaj bajo ny ne. Tãm ne Metĭndjwÿnh kute markumrêx. ¹⁶Me kute ikukràdjà jakôt amijo baja gê Metĭndjwÿnh kum me kaprĩ gê me umar mexkumrêx. Metĭndjwÿnh nhô mebê idjaerkumrêxja gê kum me kaprĩ gê me umar mexkumrêx.

¹⁷Jakam dja gar aminhijukri amidjan ajô ajte imã ikaprĩ jadjàr kêt. Kute mrãmri ne me kute Běnjadjwÿr djwÿnh Jejuo bikēnhkam apÿnh kà rã kumex pyræk ne ikà rã kumex. Jejukôt ne ba ikà rã kumex. Kam kwārĭk wãnh ajte imã ikaprĩ jadjàr kêt.

¹⁸Gê Běnjadjwÿr djwÿnhbê Jeju tu kum ar akaprĩ.^c Tãm ne ja.

^c 6.18 Djãm ar ga ne gar adjukaprĩ nhym pãnh arým kum ar akaprĩ Kati. Ta ne tu kum ar akaprĩkumrêx.